



## AD LECTOREM.

**C**ogitanti mihi, & cum suavissimo  
Collega meo Domino Francisco  
Lautter deliberanti sæpius, quæ-  
nam potissimum dissertationis  
materia nobis deligenda foret, tandem in  
mentem venit, ut eam Medicinæ partem, quæ  
Materies Medica dicitur, quodam compen-  
dio pertractaremus, idque eo libentius, quod  
Medicinæ studiosis gratam nos operam latu-  
ros arbitraremur.

Tantum vero abest, ut novum opus nos  
in lucem edituros jactemus, ut ea potius,  
quæ publicis in collegiis longo sermone, &  
præclara celeberrimorum cum Theoriæ, tum  
Praxeos Professorum opera ad stuporem us-  
que explicata, in usus nostros adnotavimus,  
paucis referre ultro fateamur.

Neque

Neque vero plantas botanico caractere definire, aut corpora subtiliore analysi Chemica rimari, aut denique encheiresin pharmaceuticam dare constituimus: amplum enim illud opus foret, atque compendii limites procul dubio transgressurum.

Solas igitur virtutes, easque præcipuas, hodie maxime cognitæ singulorum simplicium attulimus ita, ut formam, qua præscribi, dosin, qua exhiberi debeant, adjungeremus, & præparata, quæ in officinis eisdem prostant usitatissima recenseremus inutilia relinquentes. Ordinem in enumerandis Medicamentis eum servavimus, quem immortalis Boerhaave suis in institutionibus tenet.

Ego proinde ea, quæ in usus alimentarios cedunt, primum examinaturus sum; dein vero quatuor Cardiacorum Classes perscrutabor: Antidota, & quæ tum sequentur supra nominatus Dominus Collega meus pro excellenti sua, qua pollet, ingenii perspicacia, & industriæ assiduitate pertractabit. Tu interim amice Lector! exiguos conatus meos boni consule, mihi fave, ac bene vale.